

Date – 17/01/2025

Time - 18:30 -18:40Hrs

## REGIONAL NEWS BULLETIN

### HEADLINES (EVENING)

1. Prime Minister Narendra Modia chuan vawiin khan SVAMITVA scheme hnuaih property card nuai 65 chuang internet kaltlangin a sem.
2. Sorkar laipuiin ramdang mite Mizorama an luh dawna a bik taka phalna lak ngai leh tura a rawn tih hnuah hmang thei turin Mizoram sawrkar a inpeih.
3. Boruak thianghlim leh thianghlim loh teh funga hman ber Air Quality Index AQI ah Mizoram chu a him chin ah a awm.
4. Prime Minister Narendra Modi chuan naktuk chawhma dar 11 hian 'Mann Ki Baat' programme a hmang dawn.

<><><>

### PM

Prime Minister Narendra Modia chuan vawiin khan SVAMITVA scheme hnuaih property card nuai 65 chuang internet kaltlangin a sem. Vawiina Property Card dawngtute hi state 10 leh Union Territory 2 amite an ni a. Thingtlang khua sing 5 chuangah semchhuah a ni. Thusawiin Prime Minister Modia chuan thingtlang mite eibar zawna kawngah vawiin hi ni chhinchhiahtlak bik a ni a ti a. SVAMITVA scheme siam anih hnuah kum nga chhungin ramchhungah property card hi vaibelchhe 2 leh nuai 25 chuang sem a ni tawh a ti bawk.

SVAMITVA scheme hnuaih hian thingtlanga ram neitute chhinchhiahtlak sak vek niin Property card hi siamsak vek an ni.

<><><>

### SVAMITVA SCHEME - MIZORAM

Vawiina Prime Minister in Samitva Scheme hnuaih property card sem chhuah zingah Mizorama khaw 18 atanga property card 1754 a tel.

Larsap Gen Rtd (Dr) Vijay Kuma Singh chuan Raj Bhavan atangin biakhmuh theihna kaltlangin Smamitva Scheme hnuaih property card sem chhuahna hun hi a tel pui a,

Larsap chuan Mizoram chu hmarchhak state zinga Property Card sem chhuak hmasa ber a ni chu chhuanawm a tih thu sawiin, Land Revenue & Settlement hotute chu SVAMITVA scheme hnuaih hmalaknate a hlawhtlin

theih nana tan la chhonzawm zel turin a chah a. Mizoram atanga hamthatna dawngte a lawmpui thu sawiin duhsakna a hlan a ni.

SVAMITVA scheme hi April ni 24, 2020 khan Prime Minister-in a hawng a, in hmun neitute tana revenue document felfai tak, drone survey leh GIS technology hmanga chhinchhiah thlapna a ni a. Bank loan lak nana dahkham bakah pawimawh dangahte pawh a hman theih a ni.

Hemi kalpui tur hian Mizoram Sawrkar leh Survey of India te chuan thawhhona thuthlung July ni 8, 2021 khan an ziak a. Revenue survey la tihlohna khuaahte December ni 9, 2021 atang khan drone survey tan niin, December ni 2, 2024 khan zawhfel a ni a, District 9 a khua 319 ahte drone survey hi neih a ni.

Mizoram chu North Eastern Region zinga Property Card sem chhuak hmasa ber niin, April ni 24, 2023 khan property card sem chhuah tan a ni a, vawiina sem chhuah nen hian tun dinhmunah Mizoramah Property Card 2,909 sem chhuah tawh a ni a. Ruahman dan chuan hemi hmalakna kaltlang hain Mizoramah Property Card 35,000 bawr vek pek chhuah tum a ni.



## PROTECTED AREA REGIME

Sorkar laipuiin ramdang mite Mizorama an luh dawna a bik taka phalna lak ngai leh tura a rawn tih hnuah hmang thei turin Mizoram sawrkar a inpeih.

Mizoram Sawrkara Home Secretary Pu Vanlalmawia'n Akashvani Aizawl News a hrilh danin sawrkar laipuiin Myanmar ramri a awm Mizoram, Manipur leh Nagaland state-a lut tur ramdang miten e-Foreigners Regional Registration Office (e-frro) portal-ah a bika luh phalna Restricted Area Permit (RAP) leh Protected Area Permit (PAP) te chu online a dil tur a ni an tih avangin nikum December ni 17 atangin hman tan a ni a ti a, FRRO chu Kolkata ah daih a awm avangin dilna chu a hranpa in Mizoram sawrkar ah a lut lo a ti a, Kolkata atanga District ah an rawn thawn hunah chauh an lo hmu thei tih sawiin tun dinhmunah FRRO Kolkata atanga phalna an pek dawn mumal an la neilo tih a sawi.

Nikum December thla khan Ministry of Home Affairs chuan venhim ngai bik state a ramdangmite luh chungchangah Mizoram leh state dang pahnihte biak-hmuh-theih hmangin sawihona a buatsaih a, hetah hian Ministry of Home Affairs hotute chuan state pathuma an kalpui dan tur tlangpui an hrilh a ni.

Kum 2010 atanga hlih rih, he khuahkhirhna tuai thar leh a nih chhan hi ramdangmite'n he'ng state-ah te hian buaina an chawhchhuah hlauhthawn vang nia sawi a ni a, RAP leh PAP neih hmasa tura tihna hi Foreigners (Protected Areas) Order, 1958 hmanga kenkawh thin a ni a, tuna

khuahkhirhna thlah zalen hi December, 2027 thleng a ni chungin sorkar laipui chuan a rawn thar thawh leh a ni.



#### MzSRLM & RELIANCE MoU

Chief Minister Pu Lalduhoma'n Mizorama thlai leh thei tharchhuah te Reliance Retail Outlet-a zawrhchhuah turin inremna ziah a ni a ti.

He thu hi nizana a social media account Twitter kaltlanga a tarlan niin Chief Minister chuan Mizoram sawrkara Rural Development Department hnuai Mizoram State Rural Livelihood Mission leh Reliance Retail Ltd. ten Mizoram atanga thlai leh thei tharchhuah panga - Sapthei, Lakhuihthei, Dragon Fruit, Sawhthing leh hmarcha te chu Reliance Retail Outlet-a zawrhchhuah turin inremna ziah a ni a ti a, hei hian Mizorama kuthnathawktute tan an thlai leh thei hralhchhuah kawngah nasa takin a pui dawn tih sawiin sum an lak luh theih nan leh eizawna tha tak an neih theih nan a pui dawn tih a sawi.

Mizoram thlai leh thei thar tharchhuah te hi Mumbai-a Reliance Retail Outlet ah zawrh a ni dawn a, inremna ziahna ah hian Rural Development Minister Prof Lalnilawma, Adviser to CM Dr KC Lalmalsawmzauva, OSD to CM Pu Jonathan Lalremruata te an tel a, thudawn danin Reliance hian Aizawla Outlet siam turin an hma an la dawn a ni.



#### AIR QUALITY INDEX

Boruak thianghlim leh thianghlim loh teh funga hman ber Air Quality Index AQI ah Mizoram chu a him chin ah a awm.

Mizoram Pollution Control Board-a Scientist 'C' Dr. Lalramnghaki Pachuau sawi danin Mizoram chu India rama chanchinbu lian ten boruak thianghlim berna a nih thu an sawi a ti a, tun dinhmunah boruak thianghlim tak ni mahse a danglam ve reng a ti a, ramchhung hmundang nena tehkhin chuan ala thianghlim hle tih a sawi.

Dr. Lalramnghaki Pachuau chuan Mizoramah industry lian a awmlah avangin boruak chhia a tam loh phah a ti a, Aizawl khawpuia boruak ti bawlhhlawh tu ber nia lang chu motor khu ani tih sawiin sorkar laipui thupek anga lirthei ten pollution test an paltrang thin chuan boruak bawlhhlawh lutuk tur a veng tih a sawi bawk.

Mizoram Pollution Control Board hotute sawi danin lirthei pollution test na tur hmun pan theilo tan mobile testing van sorkarin a lei tawh a ti a, Aizawl atan 4 leh Lunglei tan 1 hman mek niin Local Council, zirna in emaw pawl in telkhawm ang ten hmun khatah a hlawma test duh tan MPCB ah dilna thehluh theih reng a nih thu an sawi bawk.



#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar hi puan leh a ni ang.



## TB

Ni 100 chung atana TB zawnchhuah beihpui thlak mek chu Aizawl, Champhai, Mamit leh Serchhip District ah kalpui mek a ni.

TB zawn chhuah campaign ah hian a bik takin meizu mi, zu in mi, kum 60 chunglam, natna benvawn leh zun thlum nei, chaw tha tlachham te leh TB lo vei tawh thin bakah chuap TB vei mek chenpui zawng zawngte chu X-ray hmanga endik vek tur an ni a. Heng atanga TB rinhlelh te chu an KHAK test sak leh vek an ni ang.

Thawktu te chu Mobile Medical Unit te nen khaw hrang hrangah TB endik turin an kal kual a. Tun dinhmunah Mizoramah he campaign tan tirh nikum December ni 9 atanga kumin January ni 15 inkar chhungin mi 7000 chuang endik an ni tawh a. TB vei mi 3 hmuhchhuah tawh niin TB vei te hi Aizawl district chhunga hmuhchhuah an ni.

Ni 100 chhunga TB zawn chhuah campaign hi kum 2025 ah India ram atanga TB umbo anih theihna tura sawrkar laipui hmalakna pawimawh tak a ni a. District ngaih pawimawh bik 347 ah kalpui niin Mizoramah chuan Aizawl, Champhai, Mamit leh Serchhip District ah kalpui a ni.



## PM MANN KI BAAT

Prime Minister Narendra Modi chuan naktuk ni 19 Pathianni chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 118-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

